

善事以手拍地發大惡聲於虛空中化大風
雲雷電閃種種惡相衆皆驚怖佛即觀察
說聲聞法魔既聞已歸依息惡與諸苾芻同
住聲聞乘是時衆會見佛降魔踊躍歡喜信
受奉行

佛說大三摩惹經

佛說月光菩薩經

宋西天三藏朝散大夫試鴻臚卿明教大師法天奉詔譯

如是我聞一時佛在王舍城竹林精舍與大
苾芻衆而爲說法時舍利弗大目乾連前詣
佛所五體投地禮佛足已白佛言世尊我等
今者不忍見佛入於圓寂而於此時先入滅
度爾時衆中有一苾芻合掌向佛而作是言
世尊舍利弗大目乾連有何因緣今於佛前
先欲入滅唯願世尊爲解衆疑爾時世尊告
苾芻言汝今諦聽吾爲汝說舍利弗大目乾

連貪瞋癡等諸漏斷盡所作已辦梵行已立
不受後有非唯今日先欲入滅於過去世北
印度內有一大城名曰賢石長十二由旬廣
闊亦爾彼有國王名爲月光壽四萬歲有天
眼宿命通身已端嚴諸相具足光明照耀如
天滿月所住之處不假燈燭日月之明故號
月光統領四洲九萬八千國土時世豐熟人
民女隱金銀珍寶飲食衣服象馬車乘悉皆
盈滿於城四門皆有樓閣戶牖軒窗俱用衆
寶而爲嚴飾街巷道陌掃灑清淨豎立幢幡

寶蓋直珠璣塔後有沉香栴檀香栴檀之香微
風時起吹其香氣周徧國城車馬行人不聞
穢氣處處復有花果樹木多摩羅樹迦尼迦
羅樹無憂樹貝多樹娑羅樹帝羅迦樹龍花
樹末俱羅樹阿底目伽樹播吒羅樹繁鬱茂
盛鸚鵡舍利迦陵頻伽俱計羅鳥等於諸樹
間作微妙音於城內外流泉浴池常出好花
優鉢羅花俱母那花奔吒利迦花等如是富
貴種種莊嚴佛告苾芻爾時月光天子於市
肆街巷及城四門堆聚金銀珍寶象馬車乘

飲食衣服卧具醫藥種種莊嚴之物即擊金鼓告令衆人月光天子以種種財物普施一切隨意所須求者相給爾時南贍部洲一切衆生皆至王城求其所施無不豐足得大富貴無一貧乏及徒行者爾時月光天子復自思惟雖諸衆生無有貧乏對我所用猶未齊等復以細妙衣服最上珍寶頭冠瓔珞卧具飲食等施諸衆生富貴莊嚴皆如月光天子身城邑宮殿樓閣園林種種嚴飾如忉利天有七十二百千那由他人常止此城有二千

五百大臣有二輔相一名大月二名持地容貌端正福德淳厚智慧深遠高才博識恒以十善化諸衆生是時大月於夜睡眠而作一夢王戴天冠變黑煙色復有鬼來就王頭上奪冠而去作是夢已憂惶驚懼恐有不祥而自思惟我王慈愍惠施一切求者不違必有惡人來乞王頭作是念已即用七寶造一寶頭如有乞者以此代之時持地輔相亦作一夢見月光身四體分散即召婆羅門占夢凶吉婆羅門曰此夢甚惡必有遠人來乞王頭

持地聞已悲泣感傷云何我王有斯大禍爾時一萬二千五百親位大臣俱作惡夢幢幡倒地金鼓不鳴恩愛別離悲啼哭泣如是夢已共相議曰王若不吉一切衆生誰爲救濟我等云何而得安隱時月光天子又告大臣盡我壽命施於衆生不得間斷爾時香醉山中有大婆羅門名曰惡眼聰明多智善解技術知月光天子於城四門大開施會擊鼓宣令普告四方求者供給而無乏少我今往彼乞於王頭作是語已下香醉山山有天人知

婆羅門來乞王頭悲痛傷歎苦哉苦哉此王心懷慈愍利樂群生如若命終世間薄祐作是語時天地昏黑日月不現泉井枯乾暴風卒起吹砂走石樹木摧折大地震動有如是不祥之相去城不遠有一仙人身具五通名彌濕縛弭怛囉與五百眷屬常以慈愍護念衆生見此徵祥甚懷憂惱告摩拏縛迦曰必有災禍臨於民主我等云何而爲救護虛空中緊那羅衆及諸天人皆悉下淚如降微雨一切人民心懷驚怖時惡眼婆羅門將欲至

城護城天人詣月光天子前今有惡人從香
醉山來懷殺害心欲乞王頭不得聽之宜保
愛自身固安聖體王既聞已心生踊躍歎言
善哉令我圓滿檀波羅蜜時惡眼婆羅門即
入王城守門天人見婆羅門神情醜惡隔住
門外終不放入時月光天子知彼來至不放
入城即告宰臣大月有婆羅門從香醉山來
欲見於我令彼門司不得障礙大月受教白
守門天人即令放入大月見已問婆羅門曰
汝來至此有何所求婆羅門言我聞月光天

子慈愍有情設大施會若有所求一切無悋
今來至此欲乞王頭大月告言婆羅門王頭
膿血所成終歸爛壞汝今乞得有何所用我
有七寶頭復有種種金銀珍寶俱奉施之乃
令子孫求得大富婆羅門言我本乞頭非為
珍寶時二大臣啼泣雨淚悲痛憂惱我等云
何得免斯害時婆羅門即詣王前見已頂禮
住立一面合掌白言聞王慈愍普施一切我
今遠來只乞王頭願垂慈愍歡喜布施而說
偈言

菩薩志求無上智 安住最勝清淨法

願垂慈愍速捨頭 圓滿檀度波羅蜜

時月光天子即起合掌而說偈言

父母所生不淨身 汝求我頭歡喜捨

滿爾本願稱心歸 令我速成菩提果

說此偈已白婆羅門言勿嫌我頭骨髓膿血
皮肉相連無有清淨而即施之滿汝本願時
婆羅門心大歡喜王欲截頭即去頭冠是時
南瞻部洲一切頭冠悉皆落地人各驚惶輔
相二人不忍見王捨棄身命即於彼處自盡

其壽以善根力生大梵宮時菩薩摩訶夜叉於虛
空中高聲唱言苦哉天子今將命終復有百
千億人奔詣王宮啼泣下淚傷愛別離王即
說法安慰令發道心婆羅門言王若捨頭宜
於淨處王即告言我有一苑名摩尼寶藏花
果茂盛流泉浴池種種莊嚴最爲第一於斯
捨頭汝意云何婆羅門言宜速往彼王即携
劒往彼苑中立瞻蔔樹下告婆羅門言我今
捨頭汝來截之婆羅門曰王不自斷令我持
刃非布施行時有護苑天人見是事已悲泣

涕淚告婆羅門曰汝大惡人月光天子慈愍一切普利群生何以此處害天子命王告天人莫作是言障礙勝事我於過去無量生中爲大國王於此苑內千度捨頭時諸天人皆無障礙昔濟餓虎捨身命等超於慈氏四十劫彼時天人亦不障礙汝於今日發隨喜心當獲勝利月光天子復告天龍八部一切賢聖我今捨頭不求輪王不求生天不求魔王不求帝釋不求梵王爲求無上正等正覺令未受化者迴心受化已受化者速得解脫得

解脫者圓證寂滅究竟彼岸又願命終之後舍利如白芥子於摩尼寶藏苑建一大塔令一切衆生禮拜供養見聞隨喜命終之後皆得生天發菩提心出生死界發是願已婆羅門曰王捨內財甚爲希有於未來世速成佛道作是語時王以首髮繫無憂樹枝即執利劍自斷其頭爾時三千大千世界六種震動於虛空中天人讚言善哉善哉今月光天子當得成佛復雨優鉢羅花鉢納摩花俱母那花曼陀羅花及沉香鉢香栴檀之香種種供

養即以栴檀香木焚燒遺體收其舍利於摩
尼苑及四衢路各起一塔恒時供養現在未
來一切衆生於此苑中行住坐卧及於塔前
瞻禮供養命終之後生六欲天及梵天上爾
時佛告諸苾芻往昔月光天子者今我身是
大月持地二輔相者今舍利弗大目乾連是
惡眼婆羅門者今提婆達多是由是因緣先
於佛前而請入滅時諸苾芻聞佛所說皆大
歡喜信受奉行禮佛而退

佛說月光菩薩經

佛說普賢曼拿羅經

宋西天三藏朝散大夫試鴻臚少卿傳法大師施護奉詔譯

如是我聞一時佛在王舍城鷲峯山中與大
比丘衆五十百人俱復有諸大菩薩摩訶
薩皆是一切白法具足得無量智善巧方便
能師子吼其名曰普賢菩薩摩訶薩寶印手
菩薩摩訶薩嬉戲菩薩摩訶薩功德莊嚴菩
薩摩訶薩福德音聲菩薩摩訶薩大意思薩
摩訶薩德嚴菩薩摩訶薩如是等菩薩摩訶
薩衆皆來集會爾時世尊以大慈大悲普為